

*uyyujjanti satimanto
na nikete ramanti te
hamṣā va pallalaṃ hitvā
okamokaṃ jahanti te (91)*

11. JARĀVAGGO

ko nu hāso kim ānando
niccaṃ pajjalite sati
andhakārena onaddhā
paḍīpaṃ na gavesatha (146)

passa cittakataṃ bimbaṃ
arukāyaṃ samussitaṃ
āturaṃ bahusaṅkappaṃ
yassa n' atthi dhuvaṃ ṭhiti (147)

pari jīṇṇam idaṃ rūpaṃ
rogaṇīḷaṃ pabhaṅguraṃ
bhijjati pūti-sandeho
maraṇantaṃ hi jīvitaṃ (148)

yān' imāni apatthāni
alābun' eva sārade
kāpotakāni aṭṭhīni
tāni disvāna kā rati (149)

aṭṭhīnaṃ nagaraṃ kataṃ
maṃsalohitalepanaṃ
yattha jarā ca maccu ca
māno makkho ca ohito (150)

jīranti ve rājarathā sucittā
atho sarīram pi jaraṃ upeti
sataṃ ca dhammo na jaraṃ upeti
santo have sabbhi pavedayanti (151)

appassut' āyaṃ puriso
balivaddo va jīrati
maṃsāni tassa vaḍḍhanti
paññā tassa na vaḍḍhati (152)

anekajātisamaṃsāraṃ
sandhāvissaṃ anibbisaṃ
gahakāraṃ gavesanto
dukkhā jāti punappunaṃ (153)

gahakāraka diṭṭho 'si
puna gehaṃ na kāhasi
sabbā te phāsukā bhaggā
gahakūṭaṃ visaṅkhataṃ
visaṅkhāragataṃ cittaṃ
taṇhānaṃ khayam ajjhagā (154)

acaritvā brahmacariyaṃ
aladdhā yobbane dhanam
jiṇṇakoṅcā va jhāyanti
khīṇamacche va pallale (155)

acaritvā brahmacariyaṃ
aladdhā yobbane dhanam
senti cāp' ātikhīṇā va
purāṇāni anutthunaṃ (156)